



UPA16/135  
28. april 2016  
Ane Hansen

**Aalisarnek pillugu Inatsisartut Inatsisaat allanngorteqqullugu imaalillugu Kalaallit Nunaata kitaani raajanut TAC-ip agguanneqarnerani sinerissap qanittuani aalisartunut avataasiortunullu assigiimmik 50/50-ngortillugu suliareqqullugu Naalakkersuisut peqquneqarnissaannik Inatsisartut aalajangiiffigisassatut siunnersuut.**

(Inatsisartunut ilaasortaq Nikolaj Jeremiassen, Siumut)

Tupinnanngitsumik aalisarnermut inatsisip nutarterneqarnerata inaarsarneqarnissaanik Inatsisartuni ilaasortat ilaat utaqqikatattalerput, tassami 2011-mili immikkut taasarialimmik nutarterisoqarmat ulloq manna tikillugu suli nutarterinermi alloriaqqittoqarnikuunngimmat.

Inatsisartuni ilaasortaq Nikolaj Jeremiassen, Siumut siunnersuuteqarpoq sinerissap qanittuani avataasiortunuluni raajarniarnermi TAC-ip agguarneqartarnera allangortinneqassasoq ukiumut pisassat avataasiortunuluni sinerissallu qanittuani raajarniarnermi pisassiissutigineqartartut naligiimmik avinneqartalerlutik. Ukiumut raajartassat agguarneqartarnerat manna tikillugu avataasiortunut 57 % sinerissallu qanittuani 43 %-mik agguarneqartaraluartoq 50/50-nngortinneqarnissaa siunnersuutigineqarluni.

Oqartoqarsinnaagaluarpoq ukiuni kingullerni sisamani taamatukanneq pissuseqartoqalereersoq, tassami aalisarnermut inatsimmi § 19, imm. 7 naapertorlugu periarfissarititaasoq atorlugu ukiumut agguaqatigiisillugu sinerissap qanittuani 50,43 % pisarineqartarmata avataasiortunuluni aalisarnermi taamaallaat 49,57 % pisarineqartarlutik. Assigiinngissutigaaali avataasiortunuluni aalisartitsiveqatigiinnut periarfissaq tamanna kisimi atuummat sinerissap qanittuani aalisartitsiveqatigiinnut atuunnani.

Inuit Ataqatigiinni avataasiortunuluni sinerissallu qanittuani raajarniarnerup agguataarsimanerata nalilersuiffigineqarnissaa pisariaqartutut isigiuannarparput. Ilisimaneqartutut avataasiortunuluni raajartassanik pigisaqartut inuit ikittuinnanngorsimapput sinerissallu qanittuani raajarniat ikiligaluttuinnaraluarlutik raajartassanik piginnittut agguaqatigiittussat amerlanerupput taamaakkaluartorli ukiumoortumik pisassat agguanneqartarnerani 43% akunnerminni agguaassassaralugit. Inuit Ataqatigiinni isumaqarpugut nunatta pisuussutai uumassusillit nunatta inuisa amerlanerusut naligiinnerusumik aningaasarsiornikkut iluaqutigalugit atortariaqaraat sapinngisamillu nunatta karsianut ataatsimoortumik aningaasartuutitsinnut annertunerusumik nammaqataallutik.

Tamanna anguniarlugu periarfissanik assigiinngitsunik nalilersuisarsimavugut, siunertaavorlu aalisarnermut inatsisip inaarsarneqarnerani apeqqut tassunga tungasoq ilanngullugu iluarsinarneqassasoq. Periarfissat arlaliupput siullermik misissugassatut inassutigerusussinnaavarput sinerissap qanittuani avataasiortunuluni pisassat ataatsimoortinneqalernissaat pisassanillu piginnittut amerlillugit, periarfissat aappaat tassaavoq angallatit angissusaat naapertorlugit sinerissap qanittuani qeqqani avataanilu pisassanik agguaasoqartalernissaa, periarfissallu pingajuattut mississussallugu soqutiginarsinnaasoq tassaavoq pisassat aalisartitsiveqatigiinnut amerlanerusunut agguanneqartalernissaat siunertaralugu pisassiissutit siunnersuutigineqartutut agguarneqartalernissaat. Periarfissaq alla tassaavoq pisassiissutit pigineqartut ukiuni aaliangersimasuni pigineqarsinnaasunngorlugit aqqissuussinissaq tassani angallatigissaarnikkut ukiut pisariaqartinneqartut najoqqutarineqarsinnaapput ukiuni 5-niit ukiut 10-lit akornanni eqqartuisoqarsinnaalluni.

Inuit Ataqatigiit aamma isumaqarput aalisartitsiveqatigiit pisassanik pigisaqalersimasut aalisarnermiit tunuaraagamik pisassatik oqartussaasunut utertittassagaat nutaamik agguaanissamut kinguaariit tulliit inissaqartuarnissaat siunertaralugu.

Taakkulu tamarmik kingunissaat qanoq sunniuteqassanersut misissoqqissaassallugit pisariaqarpoq. Taamaammat inassutigerusupparput siunnersuut una aalisarnermut inatsisip inaarsarneqarnissaannut suliassat ilagissagaat misissorneqartussallu ilanngullugit qulaajaavigneqassasut.

Taamatut oqaaseqarluta siunnersuut aalisarnermut inatsisip inaarsarneqarnissaanut suliassanut ilaassasoq inassutigerusupparput.